

Pertembungan Sesama Sendiri Bukti Pembangkang Tidak Sepakat - Muhyiddin Bernama
21 April, 2013

PAGO, 21 April (Bernama) -- Timbalan Perdana Menteri Tan Sri Muhyiddin Yassin berkata pertembungan calon-calon sesama parti pembangkang pada Pilihan Raya Umum ke-13 (PRU13) membuktikan tiada muafakat dan persefahaman dalam pakatan pembangkang.

Beliau berkata ketiadaan kesepakatan yang kukuh dalam kalangan parti pembangkang dari peringkat awal jelas menunjukkan mereka tidak mampu bersatu membentuk kerajaan bagi mentadbir negara.

"Pembangkang bergabung tetapi tidak bersatu. Dalam penamaan calon hari ini pun berlawanan sesama sendiri. Calon PAS dan PKR bertanding melawan BN di satu kawasan.

"Mereka tak sepakat. Ini menunjukkan dari peringkat awal lagi tak dapat membentuk kesatuan dan persefahaman. Sudah tentu mereka tidak mampu mentadbir negara seperti yang dilakukan kerajaan Barisan Nasional (BN)," katanya.

Beliau berkata demikian ketika berceramah pada kempen pilihan raya DUN Bukit Serampang di Kampung Bukit Rahmat, Gersik di sini.

Dalam perkembangan lain, Timbalan Perdana Menteri memberi jaminan semua kampung dalam Parlimen Pagoh akan dinaiktaraf dalam tempoh lima tahun sekiranya BN diberi mandat untuk membentuk kerajaan semula.

Katanya kemajuan yang akan dibawa sekali gus meningkatkan standard setiap kampung dan pendapatan penduduk selain membolehkan mereka menikmati kehidupan yang lebih selesa.

Turut hadir isterinya Puan Sri Noorainee Abdul Rahman dan calon BN bagi kerusi DUN Bukit Serampang, Ismail Mohamed dan calon DUN Jorak, Datuk Dr Shahrudin Md Salleh.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=943901>